

摘藻堂四庫全書薈要

集部

欽定四庫全書薈要

集部

御定歷代賦彙卷十四

五

欽定四庫全書薈要卷一萬七千二百三十三

集部


御定歷代賦彙卷十四

地理

蓋地圖賦

以聖德感通靈  
仙降獻爲韻

唐錢起

有虞氏提地釐享天命光啓九有緝熙八政能使坤德

以寧祥符錫慶神矣王母通靈感聖獻爾寶圖昌爾金  
鏡嗣堯之美於斯爲盛固知冥貺有則休明無極非天  
私我有虞惟神歸於至德必將永其歷數寧惟錫彼封

域俾皇鑒之昭昭豈神明之默默諒可耀寰宇盛邦國  
蓋地如何匪茲不克懿此圖錄實昭應感廣豎亥之遐  
步資重華之睿覽規方遠近微妙玄通致蠻貊於度內  
出山川於卷中可以明四目達四聰易曰不出戶知天  
下何莫假此神功徒稽其囊括也吞八極盡四溟霜露  
所墜日月所經莫不總天目入帝庭嗤秦政得燕圖以  
拓境小穆公夢鵲首以稱靈亦有周王御天漢君求仙  
窮人力於宇宙遍轍跡於山川孰與夫高居深視探微

洞玄得地理於冥契擁神休以永年則知明德在茲景  
福是降播頌聲以洋溢洎寰海與里巷美矣哉歷選列  
辟符瑞鉅萬雖玄珪告成白環入獻曷若斯圖之用也  
九土弘而庶績建

地賦

唐  
劉允濟

元氣攸分太極斯判建三才以可久開二儀以貞觀偉  
坤德之無疆恢地道之幽贊叶高明而資始孕沉潛而  
剛斷空徵王母之圖竟勞豎亥之算用能載九嶽振百

川蕩雲霧洩風煙羣物畢發衆象森然飛沉咸遂動植  
斯甄五億十選二萬八千含靈應節蓄聖懷仙元命之  
所包矣彝倫之所繫焉周易以爲理契於北墨翟以爲  
仁深於天由是開階立隧提衡建極置義和之官列司  
徒之職審其遠近辨其紆直廣輪之數不僣夷險之精  
不匿用能峻市朝明甸侯既布井而陳邑亦列郡而分  
州窪盈沃瘠之品原野墳衍之流斂跨萬俗兼該六幽  
隔蠻壤限夷陬珍卉奇木之他族鱗介羽毛之異儔詭

怪畢備璀璨咸周銀臺瑤檻玄闕丹丘鄒行之所不議  
方朔之所難紬禎符應於河象災異紀於春秋爾乃禮  
備玉衣葉隆金屋彌北渚而應慶邁東陵而誕福辭珠  
璫屏綃縠配飛龍以凝順詠闕睢以薦淑契明理於東  
南想賢才於邁軸化漸萌藻教敷種桂詠麟趾而合符  
比螽斯而繁育功宜右轉道叶上升遵四時以生殺順  
六氣以陶蒸珍符顯見寶歷相仍我疆我理如坻如陵  
徽猷潛暢禮節鬱興大鑪交泰庶績其凝用能祀列黃

琮禮配蒼壁揚義聲於農步飛仁風於禹跡服耒耜於  
田疇偃戈矛於邊場諒嬪則之廣被信興圖之遠闢

山賦

陳  
張正見

何神山之峻美諒苞結之所成東垂曰秦南服稱衡西  
戎所擅北狄標名於是堯值洪流滔天襄陵禹敷水土  
奠高刊木衆川既導羣岳自修潛通四瀆鎮壓九州森  
羅辰象吐吸雲霧深不可測遠不可步於廓靈山長爲  
作固爾其爲狀也則武當太和武功太白崑崙五門扶



寧三石峰高一萬峭峙三百登而眺之則千里無極俯而臨之則萬仞難測映白鶴而同高混青天而共色

山呼萬歲賦

以大君升中雜  
徽表祥爲韻

唐張仲素

天作大室巍乎蒼蒼立極正位含精降祥惟漢武之肇祀聞嘉言之孔彰告盈數以不忒鬱希聲之載揚於時五輅既臻千官畢會望嶄巖之絕壁升縹緲之華蓋排羽衛於山前刻金石於天外諒精誠之至感致天地之交泰於是騰洪音流翠靄始則類乎雷殷終不因於地

籟惟天祚聖谷得一而盈惟嶽降神聲至三而大夫其  
登封則千古是追峻極而四方是維瑞載光於漢史德  
且詠於周詩動合休徵有異坻頽之震響合靈祀且殊  
大塊之噫是時也百神受職萬靈獻功霽山霧收山風  
福穰穰於宇內聲隱隱於封中且啓迪之微延洪是表  
因勒成而響答殊卜祝之占兆憑乎物陋石言之不臧  
錫自天歎夢齡之尚少懿乎脗合散乎網緼邈崇丘之  
杳靄伊仰止而數聞掩龜格而鳳降軼神光與慶雲獨

得乎數千百祀何慚於七十二君稽彼衆山咨夫四嶽  
或泥金於香靄或瘞玉於縣邈封並聞夫再三響未效  
於清濁方今文物芬郁衆瀛廓澄我后克讓謙勤夙興  
以故如山之壽式當如日之升所以下臣獻頌望翠華  
之是登

山呼萬歲賦

以聖德潛融陰  
靈效祉爲韻

唐  
韓 鎡

岳則降神君惟作聖爰膺萬壽之福以奉一人之慶至  
誠斯感瑞既發於希聲盈數足徵道方期於永命伊昔

漢德方至神人以寧展升中之盛禮備昭報之天經休  
徵是格明德斯馨帝道昌而言作天心啓而昭靈諒惟  
恍而惟惚覺非雷而非霆若自觀心數已超於卜祝匪  
因騰口事全過於夢齡曾異石言方承帝祉人君肅穆  
以傾聽羣后左右而驚視訝寂寂以無人每洋洋而在  
耳數惟萬式彰悠久之期呼至三用表丁寧之旨瞻彼  
維嵩極天比崇明神是處應感潛通降喜聲於碧嶂遵  
密命於玄穹慶彼盛時巖嶺且聞於隱隱暢茲和氣人

心盡樂於融融天既輔於無親神方降於有德在肝鬐  
而昭異裨聲明而莫測孰謂乎不識不知曷昭夫或語  
或默懿其發茲大號騰彼弘音儼谷神之虛宅振山水  
之高林周流崖巘散越嶽峯和清風之遠韻凝翠靄之  
層陰若非報地承天恪慎克孝洋溢乎德澤布濩乎聲  
教則何以跡追三五之蹤歲表十千之效嚚然震盪忽  
爾沉潛儼翠華而將下仰太空而迴瞻至矣哉斯前代  
之盛事惟我后之能兼

泰山賦

元 郝經

粵大荒之播氣肇天一而爲水滓沆澄而濁凝柔洞蕩  
而剛峙故水載乎地地載乎山抵艮茁震冠海而起爲  
萬物之始終藏八索之首尾堪輿之骨壯真宰之形似  
人皇九頭俶載於祀禹鑿益焚神力是試條而爲三別  
而爲九祀而爲四中維岱宗獨尊而雄盤踞萬古莫與  
比隆衡固阜麗瘴海極熾融飈赫赫物燬其銳華固秀  
拔金天肅殺一翠橫秋萬化蹇樞恒亦宏富天地闔戶

玄都幽府固陰寒  
沍粵惟茲山首出  
庶嶽其頂則呀突  
乾維其足則亘抃  
坤絡奄東國之全  
勢孕日出之鴻燭  
作帝孫而奕大混  
天胎而不鑿為有  
生之司命權天地  
之橐籥露太初之  
面目愠巨靈之獰  
惡齧六眷而矯首  
龍七襄而奮角障  
大海使不流俾降  
丘以東作拒洪河  
之奔湍俾回翔而  
北却三州得以完  
厚萬民得以土著  
瞰臨冀魏軒輊恒  
趙背左燕遼夾右  
瀛鄣劈青徐之疆  
畛包兗豫之封略  
壓吳頭而益重梓  
楚尾而欲割拉琅

邪而橫驚控龜蒙而回躍淪濟潔以爲襟帶汶沂以爲  
約瀦大需於雷夏洩尾澤於洙鄆秦觀可以窺長安周  
觀可以窺汴洛合沓九州之半覆歷數千餘里重覺魯  
彊不爲齊弱豈無他山高蹈磊落劍門則擅其重閉樓  
石則肆其超卓天台則鬱其詭譎大行則亘其磅礴各  
據地勢偃蹇崢嶸如草昧之崛起據偏方而驕跋恃區  
區之險固徼制外之封爵孰如茲山中華正朔建極啓  
元衣冠禮樂天宇夷而皞皞王道裕而綽綽豈無羣山



紛紜交錯或繚徑之蛇結或垂巘之鷲啄或刀巖之櫛  
疊或斷壁之牙過或青蓮之天開或蒼屏之玉削如夸  
徒與宵民極其力而相較客氣鼓其餘勇冶容盛其塗  
抹孰如茲山袞冕黻珽朱紕疏越純粹中正崇高溥博  
大哉乎聯延九重鬱如深宮歸其中峰見天子之雍容  
前列如却後列如剝拱捧旋躡見百工之致恪云云亭  
亭衆星北辰石閣社首百鷲一鶚既燁湧而豐隆復曠  
豁而縣邈扶青帝之宮觀締玄臺之樓閣瀛洲邃其幽

深蓬壺敞其寥廓飛仙飄兮遨遊抱日月而遂樂采玉  
芝之芳潤探先天之希闊御絕頂之長風眇天地於目  
末閱扶桑之菌蠢幻魚龍之轆轤卯長鯨於雲根巢陽  
鳥於日脚蒼筤分其霽色鑠紅金於碧落羲和起其龍  
馭駭萬國以開覺耆貺蓄而奕奕昭靈貯而灼灼豈徒  
云乎高大乃與世而落落莫豈呈奇而露異等尋常之巖  
壑哉若夫觸石而雲膚寸而合崇朝一雨嘆旱弭虐卷  
舒陰陽杳不可度有如是之神儲膏溢澤蒸爲桑土衣

被天下民無寒苦播爲陽春孤纒天宇發育萬物勾芒  
橐籥信屈起伏如姬如煦有如是之仁既高而大又神  
而仁乃於嶽麓篤生聖人續太皞之統萃奎壁之真太  
極再造四時復春蘊而爲道發而爲文膏澤其民堯舜  
其君德與山高名與山尊六經垂天與不死者存則又  
與夫育蘭茝圃松椿出器車生鳳麟羨金錫之利蘊珠  
壁之珍者不既大矣乎宜乎唐虞盛典周漢極制巍巍  
堂堂殷秩縟事後王後帝崇德報施繼繼承承垂於萬

世

岱山賦

有序

明  
蘇志乾

泰山五嶽之東嶽也天帝之孫羣靈之府主召人魂魄  
世界貴賤修短之事又爲岱宗羣嶽之長王者膺受符  
命報告成功必秩而祭之七十二君嘗有事焉日月之  
所隱避雲雨之所鬱蒸帝王之所升封聖哲之所鍾孕  
億兆之所奔走品彙萬有之所蕃滋功化弘矣勝槩具  
焉余以計偕縹馬山椒縱目眺覽五色炫輝四時翕備

遂爲之賦以叩山靈

粵稽靈嶽岵嶭陰陽璿璣齊政角離伊疆是煜玄枵歲  
星位彰青徐充鎮嵚嶺東方巖巖矗矗以臨徬徨荷天  
衢以拓宇恢地紘而張皇宣雖融之瀏協霽網緼之淳  
光其狀則鬼崖劣崩嶮崿敞落嶙嶙曾龍從靈嶺嶠嶢其  
曠洞縣邈則寥廓轆轤輻輳騰指岢駁娑窈窕增峻  
亘以百六十里紆以五十餘盤謫塊圯而傑紛糾礧礧  
而嶭屹族雲氣幻宮闕盜合膚儵霽浮梁父長白羅以

爲輔濟河齊德飢以爲泉三宮空洞帝座蓬玄胚胎元  
命兼總羣僊府神閼鬼石室遼懸靈真九萬嶠崿四千  
封云云者霞蔚禪亭亭者雲聯丹房阿閣金牀玉几寶  
策瑛圃蟲綠蜩紫出震奠卯木德王青玉繩上顯倒景  
下經五祠三廟瑤城綺櫺金鋪獻曜觚稜窠莖駕景福  
之燿閭陋靈光之歸形碧霞鼓敷其暈映青帝奕翦而  
軒亭煥琛壁與塗壁翼瓊玃而瑤玃雕甍磊砢而鱗煥  
朱楹熠燿以髹彤析櫨戢晉而璀璨栴柱杈材而絢翰

雲崢嶸以倣儻，血懿渾以卷藏。齟舂而奮躍，蹲踞而翫。於是日觀嶽峙，則夜半天雞叫。玉雞鳴，出於暘谷。浴金漾精，微茫掣電。島嶼驚瞪，扶桑拂景。車輪紅晶，蕊淵出血。陽烏炎明，發皇耳目。披盪心神，天柱昂霄。碧落撐擎，長劍直倚。天外黿極，永藉弗傾。開顥泮於參寥，垂文虹於蒼垠。月朏庚方，觀自西成。三壺縣圭，八鴻縈襟。瓠子帶衍，滄海杯呈。其山則鳳凰石，閭徂來，泰羨石。馬象鹿，青黃纚轉峰。有丈人周秦，互弁蓮花芙蓉。屹屹

連卷石有試劒龍蟠虎踐臙脂紅門碑砢屹搢崑崙不  
足比閭風不足戀其洞則水簾迎陽黃華竄篠其紆餘  
崖則僊影御帳鵷鵠嬋媛其枝嶺嶺有青嵐黃峴十笏  
絡瑇巖峪嶇嶇僊趾如如金陀椒子剡客超超弄月鎖  
雲彌高僊閣走岫窞於杳森軋翳蒙而崎嶇拱臺登僊  
峙其隈鳳凰瞻魯踞其側天門玄武之瑰琦醴泉碾駝  
之漻洳淙泮梳洗澱飲以矜洋藥園僊案碁布而繡織  
橋步天以漱玉灣飲馬而忽雷井翻聲以潄泓澗匯溪



而汭洄大龍十八之盤詰迎天升中之徘徊瑤草琪花  
之爛漫奇禽怪獸之牝媵秦松漢柏之蚺蟒大夫處士  
之闕陲爰有梨栗棗柿櫻梅林禽中黃文冠翼翼繁陰  
石榴銀杏芍藥玉簪紫薇牡丹吐芳耀珍萱葵蘭蕙芬  
披層嶽青芝赤箭遠志長卿太一餘糧鍾乳人葠黍稷  
稻麥黃茂綠菁胡麻巨勝種各異名縣絲贗葛桐芽苔  
清石焦黃白寶藏駢臻鸞鵠鴛鴦鸞鷟鷗鷹翡翠布穀  
巧婦山僧獐狗獾兔斑文凝冰探之而靡竭按之而彌

深天地幘幪其遽篠日月升沉其戶牖煙霞玩弄其几  
席風雨灑埽其墟藪超然而遠凝曠然周覽入無而出  
有挾僊飛羽浴日御風問天而搔首握震旦於彈丸吞  
雲夢者八九瞰青疇於獲麟之野連翠岵於辨馬之峰  
祥洽五雲之太甲茅開三脊之丰茸北里鄣上或或蓬  
蓬蒼麟赤鳳鰈鰈鷦鷯不求而自足不召而咸從搜河  
圖赤符之緯識討玉牒石檢之玄蹤覓金泥銀繩之詰  
錄演嶧亭云甫之登封邠有榮期之歌側無苛虎之哭

何逃聲於霖雨崩山之音亦兆符於巖巖墜雲之覆稷  
丘濯質而煉形老父服求而絕穀散神樓安期之七寶  
崔文赤丸之馥餐芝餌石者安道於永嘉林擒繫裾者  
列籍於僊族元氣浩瀚太虛無倪虎豹九關閭闔上梯  
白榆析木揮手允擠玉京玄闕清微弗迷薜華菱彩蔭  
霞逼霓金波素舒飛壁淨奎遊河射目聚井雲題金翹  
紅蕊黼黻朝隲播景風之習習靈紫露之穰穰濛濛乎  
滲膏龍澤皚皚乎玉馬銀獐投蜺則化玉流彩齊驚則



是司莫不輻輳而沓還蓬午而充馳飄飄乎矯列缺以  
輕舉賈賈乎汎磅礴於雲螭此亦天下之瑋麗壯觀也  
爾其皇風載融帝道邳理鄂燿乎雲官緝熙乎鳥紀南  
汭烽絕狼脊望已有銘鼎糞車之醇無白雲黃竹之靡  
八駿歿驊驥之乘諧媚杜鄒鄒之品屈軼生庭藁英挺  
肥萐蒲飄搖瑞芝華起觴觥騶虞循陸游止龍盈孔沼  
之流鳥駢三足之跼穆穆藹藹清寧康泰埒造化而受  
功德二儀而躋大一人有慶兆民共賴皇哉皇哉猗歟

休哉是泰山靡記而梁甫靡旌管仲之所不必諫長卿之所不必書者也亂曰玄玄黠閼廓上真兮黼黻焜煌散澄凝兮變榮齡界展摩谿兮變駟邈邈終瓊駟兮會心爽塏鑿形骸兮泯泯蕩蕩豁我懷兮時聖道韙盛馭涯兮

日觀賦

以千載之統平上去入爲韻

唐丁春澤

日之升也浴海而麗天嶽之峻也切漢而臨邊登高者以致九霄之上愛景者欲在萬人之先其所惟一其何

惟千伊風靈之有載彼日觀之存焉夫其夜刻未終曙  
色猶昧彼窮高之極遠此有進而無退未辨昏明斯分  
覆載屢聞鳴鴈猶陰沉而不覩忽聽晨雞即曠曠而可  
愛於是漸出暘谷將離地維巖巖既秀草樹生姿氣則  
赫赫人皆仰之其望也如燭其照也無私昔者帝王御  
宇立極垂統封禪及此成功巡狩應其春仲莫不登茲  
絕頂遐燭大明思煦嫗之義窮造化之精以爲日象一  
人之德嶽是三公之名信王侯之設險俾夷狄之來平

方今一德無爲三光有象動植昭泰神祇肝蠻千巖瑞  
色思效祉以爰升萬壑春雲欲入封而空上客有才乏  
羽儀心思騫翥每積聚螢之志難登望日之處引領終  
夕含情達曙知照燭之有期故躊躇而不去重曰日有  
觀兮絕代獨立登之望兮無遠不及何太陽之至精莫  
不專於出入

日觀賦

以斜對杏冥中  
宵見日爲韻

唐丁春澤

泰嶽東南峰開一室傍接天路低臨曉日隱埋玉兔動



霄漢之微明曉報天雞越氛埃之迴出初其暝色蔥蘢  
懸崖倚空獨出清虛之外遙分莽蒼之中隱霧猶白經  
天漸紅披草樹以燈亂耀波濤而血融及夫林嶺寒消  
煙雲色變星河寥落以初沒峰巒邈迤而徐見火動山  
頂輪移水面穿暗隙以飛鏡歷幽窗而走電至若門宇  
蕭條霜空沈寥晴開曙景暖入殘宵揚晶彩以皚皚散  
芒角而飄飄露灑交薄風牽影搖觀夫望極天涯生從  
地表扶若木之歷歷出窮陰之杳杳萬壑收暝千巖送

曉消古砌之晴雪動寒庭之宿鳥遙空冷滑傷寸晷之  
難留碧嶂峒堯望孤光而漸小拔地生疾騰空影斜氣  
亂山燒光分水花絕壁孤危覺靈海之津狹炎輝咫尺  
信長安之路賒既而背暘谷以徐來汎圓靈之不礙蒙  
水氣以珠暗露松陰而壁碎霞色收錦天風斂黛披雲  
闕之斜視豁天門而俯對依簷乍吐威生齊魯之間過  
嶺逾明煦及草茅之內由是遠挂寥落高辭絕溟萬象  
焜煌而畢照六龍天矯以無寧安得足跼聳峭手扶青

冥陳白晝之苦短請陽烏之暫停

日觀賦

明唐肅

漢征和之四年帝親耕鉅定返駕泰山封禪既畢還朝  
甘泉於是東方大夫上千萬壽已而言曰臣等昨奉國  
家告成岱宗因得覽觀於巖之東臣詢其名是曰日觀  
其高莫窮上薄雲漢當宵分之未幾瞰蒼溟之有爛浴  
初日於咸池詫人世之未旦蓋茲嶽之華精實天下之  
奇玩也帝曰嘻若是則高矣極矣大矣特矣壯矣赫矣

駭矣惑矣子能抽秘思騁妍辭想像彷彿爲余賦之乎  
大夫乃置觴肅社修辭而對曰臣聞玄黃肇分清濁殊  
位立精峙結限隔風氣山惟嶽尊嶽惟東最矧斯巖之  
旁出奠吳隅而特異東介丘之近連西石門之迴對眺  
地壇之不遙俯天闕之猶墜緣絙道之百盤猶可仰而  
未至其爲體也竅峯崩劣截峯峩嶢若鑪五丁若戴六  
鼇轟乾運而莫極鎮坤維而不搖畝孰計其延廣仞孰  
測其崇高雲煙在下義娥可招宿星辰於廉隅吐風雨

於巖叢飛猱之臂不得而陟巨鵬之翼不能以超蓋將  
吞西華壓南衡駕中嵩軼北恒微九河其綫委小七澤  
其括盈彼王屋太行終南五老岷嶓鴈蕩之秀拔天台  
會稽之奇峭不啻埽阜之爭雄培塿之呈巧斯俊偉以  
絕倫諒形容之莫表若乃夜氣正寂陰魄既淪萬籟絕  
響六合同昏悄漏刻之既平忽靈雞之一鳴睇東方之  
漸豁窺赤曜之上騰丹轂微露賴盤欲呈跋烏刷翮以  
習飛燭龍銜光而迅征走神丹於寶鼎攤玉帳於金鉦

爾其吐暘谷拂扶桑沸鯨波蕩洪荒圓規閃爍以上下  
列彩絢爛而周章一沐而水府爲之震搖再頽而蛟龍  
爲之遁藏淪重光而益晃澡五色而逾光赫赭璀璨曠  
曠曄煌勢將歷九阿以朏明越曾桑而載驤當是時也  
九州未明萬國猶晦羣動尚戢衆象莫會匪是山之獨  
高曷斯覩之爲快宜命名之有義昭靈異於紀載且臣  
聞日者衆陽之宗大君之象出入以時昕夕靡爽故能  
燭萬物而發生齊天地而彌朗況居至高者見理於未

形據太上者觀下於至深彼處庠而混濁孰先覩夫大明故臣願於國家陳焉帝聞之曰善哉大夫之辭信覽物足以知道因寓目可以契心故宣尼有小魯之歎孟軻示觀瀾之箴苟惟遊觀之是樂夫豈聖哲之所任乃喜而賦日觀之詩曰日觀穹隆太山東兮未曙而日覽陽德兮居高察卑我其幾兮由閭處側豈人極兮大夫乃賡歌曰帝出震兮東方破曾陰兮奠玄蒼登日觀兮民樂康帝之德兮如陵如岡歌竟天顏悅怡聖衷攸啓

悟至道之昭晰念前行之或昧乃詔郡國詢政理培一  
德以隆基明四聰以廣視收遠討之疲兵罷求僊之淫  
祀大開明堂垂拱而治

登泰山賦

明陳璉

巍乎高哉岱宗之爲山也嶽岑磅礴峻極高崇爲齊魯  
之巨鎮奠后土之龐鴻蓋清淑之氣至此凝而不散乾  
坤闔闢之機由此蘊而無窮此其紀名載籍爲羣山之  
宗者乎宜乎廣也無朋高也無匹東蒙遜其林秀徂來



讓其紆鬱夾以梁父輔以長白巍巍之高四萬餘尺齊  
州九點視猶螳蜋陰陽轆轤日月出没煙霞嵐靄吞吐  
鬱勃神奇靈異變化莫測揆耳目之聽觀曾不究其萬  
一所以表七十二君封禪之壇爲三千餘里鬼神之宅  
也時余典司桂籍旋旆瑤京行尋洙泗思訪祖庭招白  
雲而徑進乘飈輪而迅征既載臨於社首遂弭節乎巖  
扃於焉披榛莽陟崢嶸雖一冒於垂堂償夙願於平生  
信飛步之自然履嶮巖而如平喜上躋於天門紛鸞鶴

之來迎遂登絕頂以縱大觀東臨日觀之峰西陟月華  
之巒肅瞻岱宗之主行尋封禪之壇玉牒何在金泥已  
乾望仙山兮延佇撫秦松兮盤桓振塵衣兮巖際舒長  
嘯兮雲端維時季秋金氣始肅天風號寒響振林木倏  
陽光之熹微漸華星之煜煜嬉遊已契乎夙心棲息喜  
安乎幽獨爰假榻於洞房喜清夢之方熟儼羣真之下  
臨來麾幢之聯屬參以青鸞導以白鹿招我乎瓊臺宴  
我乎瑤屋擘麟脯以薦霞觴歌洞章而鳴絲竹從而遺

以玄圃之芝贈以崑崙之玉語以象外之言授以長生  
之錄嘉會未終歸興何速脩焉璧月西流天雞呶唳琪  
林飛鳥玉闕控鶴悵仙馭之迢迢夢蘧蘧而如覺是知  
仙可遇而不可求道可悟而不可學孰能違正理越天  
常而超冥漠也邪爰念岱宗鍾靈厚地望祭之名始於  
虞氏歷代因之禮有常祀夫何封禪之名盛於秦漢諸  
帝燦珪璧之有光紛壇墀之有制玉檢金書期存永世  
豈知時有盛衰運有隆替覩遺迹之荒涼悼流光之易

逝壇壝荒兮綠草積碑碣老兮紫苔翳因登山兮弔古  
增余心兮歔歔

迴鴈峰賦

以色峙晴空迴  
翔北際爲韻

唐王 綬

衡嶽雲開見一峰兮秀出崔嵬彼羣鴈以遙翥抵重巒  
而盡迴豈非漸木有程宜從茲而北嚮隨陽既遠不過  
此以南來觀夫蒼翠遐標嶽峯孤峙輕嵐侵碧落之色  
斜影染晴江之水彼則俟時而動渺塞外以爰來此惟  
無得而踰望巖前而載止拂此穹崇歸心忽同遇瀑布

而如驚飛燉映垂藤而若避虛弓絕頂千仞懸崖半空  
遙觀增逝之姿似隨風退潛冥之意不為途窮蓋以應  
侯無差來賓有則斂飄飄之雲翰阻巖巖之黛色亦猶  
鵲踰清濟以無因何異鷓鴣渡澄江而不得於時洞  
庭木落雲夢霜晴肅肅方臨於鳥道噦噦俄背於猿聲  
稍類乎王子乘舟已盡山陰之興曾參命駕因聞勝母  
之名若夫壁立天南屏開空際信紫閣以難匹何香爐  
之可媲徒見其似恨山塹如悲迢遞遽旋導渚之心倏

別參雲之勢殊不知識其分而不越守其心而有常若  
戢藻以咀菱可居彭蠡若浮深而越廣自有瀟湘志在  
養毛羽違雪霜何集九疑而棲息歷五嶺以翱翔大鵬  
聞而笑之曰余北海而來南溟是徙高飛而萬里倏忽  
下視而千峰邈迤嗟乎銜蘆違漠之羣年年至此

芙蓉峰賦

以峰勢孤異前  
望似之爲韻

唐王 綬

疊翠重重數千仞兮峭若芙蓉非華嶽之高掌是衡山  
之一峯朝日耀而增鮮嵐光欲折秋風擊而不落秀色

長濃懿乎嶷若削成端然傑起雖千尋之直上猶一朵  
之孤峙聳碧空而出水無別倚斜漢而凌波酷似吐榮  
發秀非因沼沚之中固蒂深根已在乾坤之裏徒觀夫  
壁立莖直霞臨彩鮮上下邈迤而九疑失翠旁側參差  
而五嶺迷煙秋夜彌高宛在金波之側晴光半露遙當  
玉葉之前似吐江南如開空際高低鬬紫蓋之色向背  
異香爐之勢劍雖合質匪三尺之微茫石縱同規殊一  
拳之瓌細況乎高列五嶽光留四時名芳熊耳影秀峨

眉然而只可登也誠難採之幾處樓中送目有池塘之  
景誰家林表凝情忘草樹之姿帳號既同冠形無異對  
夏雲而競峭映花巖而增媚遂使娥皇曉望潛憐覆水  
之規虞帝南巡暗起涉江之思由是楚澤陰遠湘流影  
孤挺煙蘿之蔥翠寫菡萏之形模本不崩而不騫誰人  
欲拔若無冬而無夏何代能枯余嘗迴野遙分晴天遠  
望見國風隰有之體嘉離騷木末之狀乃曰亦可以獻  
君王之壽助山河之壯夸蛾二子胡不移來與蓮峰而



相向

二山賦

有序

宋 孔武仲

武仲嘗從清源正敏仲祠南嶽登福嚴南臺寺既又泊舟九江望廬山浩乎有遺世獨往志而未能也乃作二山賦以寄之

衡之麓兮幽幽衡之泉兮斷流方歲晏之凝沍慘風雲以悲愁忽青春之時至散沉陰以飄浮上玲瓏以交滴下青蔥其若抽谷鳥語兮闐闐澗鹿鳴兮呦呦使君來

兮此時歷巖徑兮鳴騶奉尚方之寶炷擁北荒之輕裘  
會時雪之未應叩巖祠以精求星斗煥兮臨墀河漢沓  
兮明樓佩淒瑋兮振玉冠璀璨兮鳴旒奉南帝與高真  
若交與兮綢繆既畢事兮逍遙盍翱翔兮林丘路虹霓  
之脊脅摘中天之斗牛松翳翳兮千幢竹樅樅兮萬矛  
窺三生之晏坐尋魏閣之仙游興徜徉而未盡遂秣馬  
而迴輶水悲鳴兮而惜客之去山迴環兮而邀客之留  
顧人事之不可遂徒惆恍乎離憂公杌隍兮巴陵之車

我出沒兮重湖之舟望履於潯陽復登門於邗溝語款  
曲兮有數迹浩蕩兮無由公雖寓兮天都心獨喜兮南  
州謂古鄉亦無以異於傳舍閔世俗之人齷齪而拘囚  
慕遠公之蓮社營淵明之秫疇我亦久思兮此邦奉先  
子之松楸願歸來兮卜鄰偷歲月之優游挹明波於天  
地摻高袂於浮丘浩乎遼哉斯樂不可得而言也彼何  
爲乎公侯衡山之往兮今不遑再廬山之居兮公其早

謀

祝融峰觀日出賦

有序

明 顧璘

嘉靖丁酉仲冬幾晦姑蘇顧璘巡方至衡謁嶽神訖乃  
登祝融宿上方翼曉觀日出景象特奇遂述而賦焉賦  
曰

維南衡之崇嶽標祝融之危峰下蟠據乎厚地上峻極  
於蒼穹匪丈引之可度盡他山其難比隆睇四極而無  
蔽又何限乎寰中觀其欽崒崒聳嶽直上莫止捫歷參井  
靡高弗至躡浮履霄帝居或指足跼汗慄不敢俯視何

其高也若乃斗杓既仄啓明未升漏刻已盡荒雞甫鳴  
天莽蒼其一色泯萬動猶無聲謂日出其可覩乃跂望  
於高亭爾其遊氛且凝灝氣欲豁萬里乍近沕沕穆穆  
睽彼陽輪尚爾淵汨冥迷遼漠恍不可度少焉光景上  
燭高漢舒白如火將炎大暗微晰羣望方勤目不移盼  
積靄倏烈閃爍驚電駭指失叫乍見一綫漂沉搖曳湧  
出波面燭籠外赤鳧卵中黃上殷下闇半吐半藏依微  
澁澁如覩海色水火交爭良久乃脫於是金烏高舉若

木影離羲和叱馭八表馳暉所可疑者視扶桑於咫尺  
東曠望而無窮日遲天之一度何環周之莫同參渾儀  
與宣夜猶想像其若惜大哉天之爲天也固致詰而難  
終

衡嶽賦

明 俞安期

在昔黃帝辨位正疆咸取崇山表其五方湘江之陰荆  
漢之陽乃有衡山位是離宮上直機衡之度殷朱鳥之  
精曰維南嶽以奠火鄉瀟霍為副其後匡廬佐理其旁

爾其山也遠而望之靠崇增屹崖墮峭嶒嶂參崦嶮戢  
昂嶺嶙亘坤絡掩天經噓雲映霆直干乎太微之廷既  
而入也峽崕崩旋巉崖歲褭鬱甌歎火萬谷千岐峰岑  
疎密以離立岡嶺相屬而遷迤同丘共壑一雨一暘連  
崖接岫或陰或陽雷電冬出凌雪夏藏衆態之變譎怪  
靡常理不可會語不及彰於是跋硤踞蹠岫岵出嶄巖  
入嶮巖翔燕頤頤之道蟠蛇迴復之蹊驟瞻已絕屢覲  
若迷既前征而後折亦步隆而降卑畢歷夫礧礧之礧

碁始逮乎屈屨而上躋斯乃赤帝之所幸祝融之所棲  
彼躡羣有而特上孰下載者而並之羗獨立以頽仰恍  
履地首而中穹窿肆馮夔以遐矚信目至而地窮川九  
向以九背嶺五伏而五崇九嶷負百粵而禮極江漢領  
九派而朝宗介巫黔而辨巴徼越南訛而延暑門夜日  
觀乎海溼極星指乎地中其邇察茲山之全形度脈絡  
之終始零陵挈其首洞庭濯其趾右掖夫夷之流左糾  
瀟蒸之委周環計之何啻八九百里其峰則岫嶺別起



紫蓋爭高石廩一闔天柱雙標芙蓉轢乎靈藥軫宿之  
壓瑰霄雲密與雲夢旅列靈禽與翠鷺同翺耆閣狀類  
乎竺國安期名託乎仙曹金簡映慧日而相耀屏障倚  
雲居而周旋蓮花冠青岑之上華蓋導白石之前惠車  
所棲之煉玉劉根晚遊之僊巖以逮白馬迴鴈吐霧煙  
霞毛女巾紫碧岫日華雖羣形之殊肖孰不奮倜儻而  
矜瑰異其鴻鉅以列名者總七十有二巖有黃帝之特  
室神禹之齋房朱公九子夕陽夜光壇有青玉白璧洞

有朱陵抱黃又多仙靈之寄託化人之經行類傳會以  
建號者致不可乎具詳其水則演澗淖淥浩渺沔漉  
漉汧汧沔沔始澤沸以濺漚既灑灑以急疾滲漉  
則潛潤乎弱土歛薄則觸聲於危石或下墜若絡絲或  
上縣若飄帛或盪瀾分流或滄漚相激百潭瀦而淵渟  
千谿劃而漫滅池不墨而成黟泉不黠而爲碧靈澗不  
雨而澍漑雷泓不流而湍澍其石則硃礧礧硃礧  
硃礧礧礧傾若待扶聚若鳩族譎者鬼裁巧者神琢

中有五金之璞維綴之碧礪礪雲母青腹絳砂玄碧碧  
若青磷赤礪礪礪礪其木則杉梓娑羅杜梨楮櫟楓  
檣栗椶椿檜櫛椶鬼桃女貞桂根樵漆郁郁芬質維檀  
及楹往往而是匪松伊柏堙塹蓋顛黝黝鬱鬱噫氣類  
索籥之懷風夾道若旃幢之障日挾響則萬壑同鳴吐  
萼則千丘互色若夫產於深谷植自平原葉糾結而櫟  
櫟榦直上而森琴短猶數仞脩或十尋至於踈立名岑  
托根防石本澀縮而不長枝倍之以橫出蜺蜷擁腫櫟

施曲屈紛綸不一其有萬年之松枯使活之千年之竹  
截甌可炊小而短者中杖可攜青黃之精珊瑚之芝木  
石之耳芋蘋之魁餌之澤悴兼可調饑又有紫茜可染  
龍鬚可編焯綴厓石萍編莎暎神農所嘗之藥羽釋所  
藉之粳諸莫不亘深而冒迴苟至者咸得而可將逮夫  
瑤夷金卉琳腴玉漿赤瓊之髓五石之英太上所秘山  
祇是護非棲心杳冥之輩窮跡靈輿之區者夫孰得而  
可選獸則黃斑之狼白銀之麇玄猿青兕兔鹿麕麋鳥

則白鵲蒼鵲鷦鷯鷓鴣諸鵲鵠鷓鷯鷓鷯鷓鷯鷓鷯羽不吝飛  
蹄不吝趨各逍遙於幽突隨所赴而寧居其諸幽怪弛  
張夔罔跳嘯執書之老翁烏魑之年少類齊諧之所編  
然犀之所照實譚之而匪經將述之而寡要其宮室則  
赤帝之居顓爲豐傑儀紫宮以繚垣法象魏而表闕飛  
樓岑疊乎四隅輦路矢行乎八達入南端歷左掖步丹  
墀納文石金神提銳而旅陳玉女捧匱而分侍恭禮垂  
旒洋洋在位目一其瞻心雪其穢容不肅而自莊精不

顙而自萃既而覽穹殿之鴻麗又目駭而心驚肇規制  
之區畫儷峰數而作程崇以七十二尺列以七十二楹  
文梁霓起以夭矯華榱蛩集而縱橫綺錢周網層案相  
承鏤以四荒之獸倒以玉井之英朱塗電散彩飾霞蒸  
曠燼闔以嶸崖赫熒燭而晶熒乃其長廊九十六翼首  
自端闈旁抵寢室紺碧其材繡繪其壁凡遊閒燕樂優  
俳戲劇展帙披圖擊鞠博奕農作女紅樵採漁弋揚杵  
擣衣輓轡井汲加以奩香篝衣嬪御上直罔弗曲摹其

形態殫協渠乎洞清之筆其前環以百家之市其中貫以三條之術右弼釋氏之寮左輔黃冠之宅二教並居同門異閥粵自軒遊之駕虞巡之蹕以至舉柴而望及乎遣使宣臆加帝王之尊稱比公袞之上秩度縣牲牲埋瘞圭璧禮以赤璋藉用茅席盛典於是乎臻百神於是乎集靈臺侈於玄文寶洞宣於玉笈古今告饗之辭猶載穹碑之勒故屢易受命而不忒考昔盛時瞻彼圖經萬壽靈虛安寶玉清光天銓德九真黃庭若此者稱

宮建九爲觀十八浮屠之居五十四刹及樓閣亭榭書

室講堂靈樞神屋竹院松房謂鴻紛而屹峙鬱被谷而  
彌罔錯金碧於蒼翠侔乎甘泉與林光慨今昔之夏殊  
返太始之鴻荒問新基而古號亦稱存而若亡廬庠偃  
壓十九付於無何有之鄉乃若方廣昉於天監上封改  
於隋煬嶽麓蔭於星沙鴈峰起乎衡陽楚安垂明月之  
下寶勝列香爐之傍白鹿踞武陽之里白鶴棲崇嶽之  
鄉龍橫覺海雞鳴上方雙峰淨居七寶大明道林崇果



高臺清涼爰及西明南臺福昌福嚴衡居會善天臺祝  
先法輪多寶雲封湘南化成花藥攝受白蓮豈中墜而  
末舉抑大圯而小延寧無肇建於後亦有盛踰乎前計  
十存其七八而鐘磬之聲猶相聞焉其若開山海印衍  
宗石頭或有賜號隋主服役金牛嬾殘思大林公十八  
僧之傳又若白膠辟穀於雲隱雙子擷秀於靈芝太微  
太案並依金母之殿景童丹霍分卜石室之棲帝女感  
玄皇而飛遯華存慕至道而宅茲禮正飯靈草而顏駐

道全駕仙驥而軀飛赤精授經壇上郁之諷誦靈臺二  
薛前後以息駕鳳仙幽獨而杜機彌明靈期寥師三清  
之儕以棄俗爲教居山爲藪師清淨而友太和家彼岸  
而戶淨土神皋靈窟固其所也穹厓邃壑亦其主也然  
自夏載探玉字之冊發蒼水之司刻鳥跡之碣紀治水  
之辭及周之讓王采藥臻斯其後懷奇挾異之偉士逃  
虛傲世之仙才司馬浮湘而至向禽結侶而來昌黎觀  
決雲之會洞叟遂采霞之懷鄴侯英國劉氏三之若其

類也皆繭趾薰顏杭險梯艱里土或萬挾糈彌年或僻  
居茹苦或冥索羅顛豈非冀倬詭之儻遇而神秘之或  
宣參大塊之羣變易眸目之恒觀也哉乃有菰蘆之鄉  
縫掖之士幼沈六義之淵壯結五嶽之志嗤婚嫁之待  
畢乘筋力之未瘁至自天門之月馬逢敦牂之歲始歷  
其一未覩其四意者較夫嵩華之與泰恒亮非隸其左  
次綴往哲之闕章并作頌而告之大庭氏之帝曰天作  
有宥望禮既隆百神既同維南之宗誕哀厥靈靈亦駿

發蕃育萬物物亦昌達煌乎帝靈火德是興降昭厥禎  
以畀我文明異顯帝德有炳有蔚華子之國黃離永吉

御定歷代賦彙卷十四

欽定四庫全書薈要卷一萬七千二百三十四

集部

御定歷代賦彙卷十五

地理

華山賦

有序

唐楊敬之

臣有意諷賦久不得發偶出東門三百里抵華嶽宿於  
趾下明日試望其形容則縮然懼紛然樂蹙然憂歌然  
嬉快然欲追雲將浴於天河浩然毀衣裳晞髮而悲歌  
怯欲深藏果欲必行熱若宅爐寒若室冰薰然以和拂

然不平三復晦明以搖其精萬態既窮乃還其真形骸以安百鈞去背然後知身之治而見其難焉於是既留無成辭以長歎儻然一人下於崖金玉其聲霜雪其顏傳則有之代無其鄰姑射之神蒙莊云始不敢視然得與言粲然笑曰用若之求周大物用若之智窮無端三四日得無顛倒反側於胷中乎是非操其心而自別者邪雖然喜若之專而教若之聽無多傳

嶽之初成二儀氣凝其間小積焉爲丘大積焉爲山山

之大者曰嶽嶽其數五余尸其一焉嶽之尊燭日月居  
乾坤諸山並馳附麗其根渾渾河流從禹以來自北而  
奔姑射九峻荆巫梁岷道之云遠兮徒遙而賓嶽之形  
物類無儀其上無齊其傍無依舉之千仞不爲崇抑之  
千仞不爲卑天雨初霽三峰相差虹蜺出其中來飲河  
濱特立無朋似乎賢人守位北面而爲臣望之如雲就  
之如天仰不見其巔肅何芊芊蟠五百里當諸侯田嶽  
之作鬼神反覆蛟龍不敢伏若歲大旱鞭之朴之走之

馳之甘雨爛漫百川東逝千里而散噫氣蹶然怒乎幽  
巖漸於人間其聲瀏瀏嶽之殊巧說不可窮見於中天  
淙淙而掌戕戕而蓮起者似人伏者似獸坳者似池洼  
者似臼欹者似弁呀者似口突者似距翼者似抱文乎  
文質乎質動乎動息乎息鳴乎鳴默乎默上上下下千  
品萬類似是而非似非而是其無繕人事吾焉得畢議  
今作帝耳目相其聰明下矚九州在宥羣生初太易時  
其人俞俞其主人者始乎容成卒乎神農中間數十君



姓氏可稱其徒以飲食爲事未有仁義時哉時哉又何足涖是後敬乎天成乎人者必闢其心假其神與之齡降其人故黃有盛德蚩尤爲賊生物不遂帝乃用力大事不可獨治降以后牧三人有心烈火就撲其子之子其孫之孫咸明且仁雖德之衰物其所宜由夏以降湯發仁以王癸受暴以亡甲戌誦釗不敢有加唯遵其常享國遂長天事著矣莫見乎高而謂其茫茫余受帝命億有萬歲而不敢怠遑臣贊之曰若此古矣祖矣大矣

異矣富矣庶矣駭矣怖矣上古之事粗知之矣而神之言又聞之矣然神起居於上宮室於下如此而久矣其所見何如也曰見若咫尺田千畝矣見若環堵城千雉矣見若枯水池百里矣見若蟻垤臺九層矣醯雞往來周東西矣蠨螋紛紜秦速亡矣蜂窠聯聯起阿房矣俄而復然立建章矣小星奕奕焚咸陽矣纍纍繭祖龍藏矣其下千載更改興壞悲愁辛苦循其上矣臣又聞云古有封禪今讀書者云得其傳云失其傳語言紛綸

於神何如也曰若聞聖人撫天下既信於天下則因山  
嶽而質於天不敢多物若秦政漢徹則率海內以奉祭  
祀圖福其身故廟祠相望壇墠迺邇盛氣臭夸金玉聚  
薪以燔積灰以封天下怠矣然猶歉歉不足秦由是替  
漢由是弱明天子得賢者在位能者在職廟堂之上垂  
衣裳而已封禪存可也亡可也

華山賦

有序

唐  
達奚珣

太華之山削成四面方直者五千餘仞蓋嶽之雄也往

因行邁望之不及今來何幸作尉於茲因而賦之以歌  
厥美

華山惟嶽羣嶽之雄天開厥狀神致其功昔與襄山連  
岡不絕河水長注橫流曲折神元再造拓崖而兩分仙  
掌常存倚天而迴列其後多歷年所至於夏王窮地絡  
正乾綱綠甲之功既就玄圭之業有光定我祀典因爲  
舊章同夫三事偉哉煌煌徒觀其倚伏而起削成而峻  
作秦塞之高標爲豫州之巨鎮其南接楚其北臨晉嶽

乎數都之間豈惟直上者五千餘仞遠疑將適近若將  
騰氤氲綠潤霏霽青凝發地壁立連天石稜披重霄而  
自致與元氣而相陵旁望羣山兮盡為幽側猶夫南面  
兮用資峻極巍巍乎掩夏雲之奇峰蒼蒼然合秋天之  
正色近壓闕輔載樞京國此其所以爲嶽者也若乃人  
寰不遠勝氣常清石含古色泉落秋聲懸巖蔽虧謂乾  
坤之闔闢洞壑幽邃汎雷雨之滿盈恍恍乎又似龍虎  
潛伏鬼神含精伊彼崇林望之盡目參灝氣而森秀倅

斷山之遙，蠱仙草殊品靈花異族，不以無人而不芳香。  
風麗乎函谷，皆負靈造，是潤是黷，具物靈繁，故難詳鞠。  
蕭條世俗，髣髴神仙，玉女明祠，星壇尚在，羊公舊室，石  
榻常穿，霧雨迷處，雲臺巍然，則知大象所存，何有於古。  
列真攸萃，寧獨於先國家南正司天北正司地人神不  
擾方嶽，定位森森象設之若生，懔懔威稜而可畏，宗伯  
制禮巫咸視事，殺氣每登，駢剛必備，蓋所謂敬而無黷。  
厲夫精意，此則邦之禮物也，受命如響，普依人而榮，攸歆。

盛德載答嘉生不僊旬時作爲雲雨白漿既挹黃玉斯  
睹隕止如山永康中土此則神之叶贊也物被山嶽非  
無壯麗或隱峰於羣嶺或結根於荒裔空聞象外之談  
何貴人間之世而我直兩都之大道當三條之正中偏  
近日月高謝紛濛通天之氣成天之功鑾輅常幸聲明  
有融能事無爽揚言莫窮舉天下而爭長故難可比而  
崇

華山賦

明許讚

噫吁魏哉華山質聳千萬餘丈於鼇極之初分其高無  
垠根蟠千萬餘里於混元之始判其大孰倫突出雲表  
直指天津噴吐風雷拂拭星辰慨自洪荒以來義農之  
創則軒唐之造釣舜禹治績湯武革因皆興起於嶽麓  
之左右孰不法象乎夷則而仰遵乎明神迨夫秦漢以  
下則但知陳玉帛以徼福具牲醴以致禋而已孰知嶽  
宰西方秉灝靈掌商政令肅貞上天付以收歛劾實之  
名號委以清汰勁政之權衡凡物之未過者不阻其長



養物之太盛者必伏其裁成故月無替次日無逆行雲  
無妄發雨無妄晴禾稼不得過時而暢鬱草木不得蕃  
候而妍英夫西行爲金金禁也物之流溢茂濫過常度  
矣禁止之而不得肆金色爲白白質也物之炫耀文采  
失本原矣白還之使歸於情匪曰摧其華節之則復生  
匪曰傷其英斂之則復榮此嶽之性情司令通萬古徹  
八垓而無息無更者也以言其景象則黃河洶湧望嶽  
而南注者若朝涇渭潺湲遵嶽而東過者如緯玉井澄

冷兮時寶蓮之奇祥月嶽窈窕兮森羅藤之芳蔚硯青  
柯兮蒙古樹之槎枒觀白雲兮聽飛泉之鼎沸其至奇  
者五指嵯峨於凌巔千載具言而可畏名爲仙掌不知  
何謂豈以制引煙霧虹霓而節宣化理抑指麾垣度辰  
躔而佐調元氣乎其名曰華者則以其亭亭萬丈而巖  
巒交匝靈秀萬狀而四出如蜩磔硤無窮稜層難既依  
稀乎紅紫蔥蒨乎蒼翠或折辮分枝或呈葩衍類望之  
者真如芍藥芙蕖而四面互植玉樹玫瑰而千章交蒂

也名之曰華是爲可貴

華山仙掌賦

以化作有端遙存麗壯爲韻

唐尹樞

覽削成之峰見靈掌之狀拓跡崇岫據奇疊嶂迨亭上  
竦赫奕東向高蹤可覲猶存二華之間纖指遙臨遠蹠  
重霄之上爾其依峭壁據崇巒排物外撫雲端羽客遐  
指都人竦觀據開闢之殊致若騰陵而上干惟昔巨靈  
啓斯太華拓崇崇而喬嶽西靡決浩浩而洪流東下故  
能遵八川安萬化幹厚土存中夏姜嫄歆於帝武跡可

相倫伯禹導於龍門功亦齊霸厥道可遵厥狀斯存仰  
摧天漢遙臨國門蓮萼高生如將攀擷桂枝傍倚狀欲  
攀援試冥搜於玄造諒遺跡於坤元若乃傍攀冥蒙上  
指寥落右倚岑嶺左臨絕壑紛詭狀之無朕諒神功之  
有作星壇未沒必俟於捧持石鼓常鳴庸非其拊搏揖  
之永久斯爲不朽嗟列嶽之所無小終南之何有喻天  
地惟資於一物拯沉溺豈藉於煩手常抗跡於介石乃  
遺芳於崇阜依乎沕寥揭彼嵯嶢聳眈眈於千仞擢纖

織於九霄折若華於暮景捧麗日於晴朝既瞻眺之無  
數望提攜之匪遙共仰瓌姿徒懷壯麗如排霧霧似拂  
昏曠遐窺巨跡猶存體物之辭迴瞰崇朝暫寫凌雲之  
勢

仙掌賦

以指掌極瞻峩然秋碧爲韻

唐喻 餽

行盡煙蘿仙峰隱嶙兮高掌巍峩無得而踰扼金方之  
險固不言而信指秦地之山河觀其巔肩削成峯岑遠  
蹠幹開元氣剖破凝碧五千餘仞兮似假扶持百二之

都兮如能指畫每勞瞻望徂秦適洛之人誰可攀援駕

鶴驂鸞之客勢比捫天形標一拳旁臨而靄靄無際直

上而巉巖克全稍謂動搖帶晨光而耀若如同拊擊聞

石鼓以轟然可以引羣生麾八極孤標承露之狀想蓄

拔山之力霽雨飛盡見毛女同掌上之人嵐岫叢分封

蓮峰為握中之色勢孤聳於巖巖形不類於纖纖折煙

霧以斯出控關防而可瞻夕清而丹桂輪低疑將褰佩

晝短而六龍駕逸似欲攀髯拏攫難窮規模酷似莓苔

剝綠以盈握，葛藟駢青而繞指。因罅裂以文成，偶嵌空而脈起。齊大道之悠久，挈坤維之綱紀。有客西遊，時當凜秋。始憑軾以遐睇，惟攀雲而寫憂。吾聞太華中立，黃河西流。有巨靈兮受天之命，擘奇峰兮裂帛斯柔。故得一帶東引，致洪濤而直注；千尋西峙，標異跡以長留。况乃豫鎮稱雄，秦城是仰。沉潛之右臂斯見，示化之前蹤可賞。豈非大壯皇都，制遐荒而示諸掌。

仙掌賦

以白帝西下黃河北來爲韻

唐房元洛

造化巍巍表迹西夏蓄巨靈之鼎肩擇雄峰以照寫迴  
抗羣嶽旁臨九野誰謂河廣我則視之於掌中誰謂山  
高我則數之於指下駭乎哉當其清濁未判兆朕未彰  
孰謂真宰廓此殊常奠峻嶒之蔥翠分靈掌之玄黃直  
指無虧受金莖之勁質如山不動合仁義於聖王爾其  
雲散天澄煙消雨霽旭日暉映陰崖虧蔽狀若拍紅霞  
之霏微捧青霄之搖曳察其迹也雖見於東峰混其嶽  
焉是配於秋帝及乎蓐收謝玄冥格日彩寒霜乳白上



捫星漢左控虞虢南聳羣嶺北臨廣陌將招泛槎之仙  
如指迷途之客至其嵐翠朝鬱輕雲夕過桂影依稀而  
流照松風髣髴而扇和時也靄靄溶溶疑掩冰紈之被  
蒼蒼纂纂如揮舞袖之羅功洽於人則摩太華攀長河  
俾安流而不極適徂東而自北千古獲其永賴兆庶階  
於壽域同彼補天之功陋其拔山之力然而山匪我開  
功匪我裁班形今古任質徘徊人之睹也因似而生意  
靈之契也曷究其從來風物已淒我來自西駭高掌之

隱嶙思元化之端倪願稅駕以攀覽庶登路而見攜

掌上蓮峰賦

以題爲韻

唐呂令問

衆山邈迤曾何足仰未若太華崑崙爲之長削成三峰壁  
立千丈伊昔太虛結而爲山伊昔巨靈拓而爲掌擘開  
元象崛起厚壤當少陰而德合秋成據丁酉而氣涵金  
爽深沉其色茵萑其狀雲霞不映而其勢彌雄塵露將  
裨而其高靡讓掌形仙蹠石容天壯雖造次於自然若  
鐫磨於意匠晦夕霧而羣峰乍隱照朝陽而衆壑相向

由是考圖籍高爲四嶽之先盼靈奇勢出九天之上若  
乃雲搖羽蓋鶴挂飛泉危峰並吐巨掌高懸異蓬萊之  
鼇泛海若崑崙之柱承天清露降零小爲盤而仰漢陽  
烏假道疑覆日之孤蓮不但子先之霓裳時見羊公之  
石榻仍全況乎運啓皇家應河源而降望豈比詩歌周  
德美嵩甫之生賢者哉既而嵐氣霽媚煙光晚濃林巒  
一色巖崿千重想清虛而可覩歎攀陟兮無從歌曰苔  
至滑兮石無蹤道不可得仙不可逢儻賜一丸生羽翼

願輕舉於三峰

晨光麗仙掌賦

以有如攀青天  
捧白日爲韻

唐潘存實

晴天既曙峻嶽凝青仰熙熙之旭將吐見高高之掌呈  
形假彼晶光庶有分於清濁挺茲秀異示無雙於杳冥  
燠矣而昇峒然相射浮豔華之爛爛靡太虛之奕奕寫  
乾坤之麗色先覺瞳矐廓煙霧之餘姿轉見明白疑參  
若木似坼芙蓉杲杲之容漸積慘慘之狀不如下映而  
千巖共曉上照而丹霞共舒影曜人間每當瞻瞻之早

跡居物外長承煦煦之初昭昭以臨  
我我莫匹向空凝彩若月下之對金  
莖繞指流輝異樓上之呈素質既炫  
晃之旁達亦孤標而獨出幸當清淨  
之晨免敵沉陰之日佳氣或爍朝雲  
不還發明媚於紫霄之際擎彩翠於  
碧落之間自彰和朗寧俟躋攀遙揮  
六龍迴臨萬有初分焜燿訝髣髴以  
成文俯掬清光信爛熳而入手則知  
事不自妍理資相鮮因流光德獲照  
金天想清風旁來宛其穆若視晴景  
中駐何媿拳然故得無私功博潤色

道全當八極洞開之次明二儀交泰之先豈獨擘洪濛  
而干造化設形象以配神仙而已哉於是靈蹤長聳日  
華長捧不然何羣山邈迤而相奉

巨靈擘太華賦

以神力所作開  
山導河爲韻

唐關圖

太華崔嵬伊巨靈兮其壯哉挺高掌以遐舉擘孤峰而  
洞開功侔造化勢越風雷劃千仞之巖巒屹從地裂決  
九河之波浪杳自天來昔者混茫是生磅礴惟神無朕  
配天有作念彼流之未通顧茲山之可却將以闢迢遞

正斬鑿愜心而再定川原應手而別開林壑靈意將神  
雄稜益振蓄怒顛肩注情嶙峋謂釣鼇不足以駭人鞭  
石不足以騁神指揮而疊嶂知改盼睽而三峰可新然  
後攘臂效能端身任力捫蒼靄以天半折翠微於月側  
若百神將萃而潛助二儀欲判而未息嵐光兩向猶連  
松柏之聲黛影中開已斷雲霞之色豈不以閼形幽默  
拓跡巍峩致用而扶持天地程功而變化山河分積翠  
於空中千年軋漢啓通津於指下萬里騰波豁丹崖於

天阻呀峭壁而相距勢且異於兩傷力自弘於一舉截  
仙子幽栖之洞壯王者建都之所蓋以神開壽域靈固  
人寰廓峻極於倏忽標削成而險難超大禹之理水小  
愚公之移山竹箭波中路竟深於導達蓮花峰外跡終  
寄於躋攀是知事冠杳冥理歸玄奧石有時而分裂水  
有時而疏導信乎宰物者之使然非人情之所到

西嶽望幸賦

唐閻隨侯

壯哉大華兮爲金方之鎮削成四面壁立千仞勢阨河



關兮橫地以傑出氣雄宇宙兮極天而增峻疏鑿則禹  
封崇則舜歷選列辟咸五載而一巡於昭有唐曷不登  
以肆覲我聖君之開元一十八載威靈限乎無外至德  
與日月齊明寶位與乾坤比大鴻澤洋溢湛恩滂沛萬  
國同於文軌百蠻襲於冠帶河海清夷風雲昭泰鬼神  
奔走而奉職玉帛梯航而入會蕩蕩乎巍巍乎誠聖人  
之神用也美不可得而稱載至若祖武宗文之業觀風  
問俗之勤舉由禮兮動爲仁禔百福兮延羣神無文之

典咸秩中和之政惟醇邦國之鴻徽克播帝王之盛事

畢陳若乃詩書禮義之府禮樂典章之則設金馬石渠  
之署修成均崇文之職坐公卿以論道養更老而崇德  
詢善而當宁委裘禮賢而日旰忘食振木鐸而施令正  
銅儀而御極歌舞盡盛德之容聲明彰具物之飾此聖  
人之文教也先王剡木爲矢弦木爲弧所以修戎器戒  
不虞於是簡車徒誓將帥百官象物而動軍政不戒而  
備重之以三令五申示之以戎昭果毅正卒伍駢部位

鵠鵠魚麗兮鴈行鱗次鳴笳疊鼓兮隱天動地自朝及  
野兮千乘萬騎谷轉山移兮天旋雲被赫赫震震耀武  
中原兮將除害以興利因農隙而講武事羗夷覩之以  
奪魄蠻狄聞之以挫氣雖商湯有景亳之命方此以知  
慚周成有岐陽之蒐比茲而多媿然後班師旅行慶賜  
穆穆煌煌焉舍爵策勲而飲至此聖人之武功也太原  
啓聖誕受駿命傳萬代兮本枝盛上黨興王休有烈光  
應大橫兮天業昌漢高不忘於豐沛光武本起於南陽

故踰孟門越太行鏟危磴夷高岡馬無泛駕兮鑿佩鏘  
鏘車靡摧輪兮和鈴缺缺紛芻霍以電邁震隱轉以軍  
裝至入乎舊宮之皇皇思宗祖之艱難詠潛龍於沂康  
出德教兮修國章問老病兮勸農桑豈徒率子弟以佐  
酒歌大風而還鄉此聖人之巡狩也古者爲高必因丘  
陵爲下必因川澤去春陵之天邸望臺駘之星陌黃軒  
訪道乃逍遙於廣成丹陵出遊還悵望於姑射踐唐人  
之舊壤遵漢家之餘迹祠后土於汾陰盛禮容於瑤席

既而泰折啓方壇闢有潔在盛有牲在滌奏咸池兮羅  
金石欽瘞繒兮埋玉璧幽髣髴兮地祇格電輝輝兮神  
光赫時展豫兮羣瑞臻紛景福兮隨吾君黃龍降兮應  
景運寶鼎見兮寫龍文整樓船兮濟橫汾縱歡樂兮歌  
白雲此聖人之報地也禮行於郊百神受職焉禮行於  
社百貨可極焉既即陰以報地遂就陽而禮天因吉土  
歷廣廛跨周服掩秦田萬乘星陳出直城之郊外八方  
雲會就京兆之天邊騎雜沓車駢闐赫赫奕奕而燭川

以屆乎圓丘之前於是牲用特酒尚玄樂以雲門是重  
禮以蒼玉爲先推高祖以作配五精率而來旋達上下  
合腥臠設柴燎致高煙上帝降監兮享明德子子孫孫  
兮萬億年此聖人之禮天也王者受命必升中以因名  
山告成功而紀厥美四時以春方首事五嶽以岱宗爲  
始無懷以降七十有餘管仲所詳十二而已我皇承先  
王正統繼列聖遐軌幽明協同靈物蕃祉故天不愛其  
寶地不愛其珍卿雲爛熳而動色醴泉湧溢而流津莫

赤匪狐九尾而自擾莫黑匪烏三趾而來馴况復西鷄  
比翼東鰈呈鱗秬黍生於鄔沚苞茅出於江濱一莖九  
穗之禾備采盛而競發雙貉共舐之獸供犧牲而自臻  
可不謂然乎我皇雖以地平天清時和歲貞欲行封禪  
之事猶執謙撝之情則有冠冕列辟搢紳諸生互陳嘉  
頌爭獻懇誠候屬車之塵者率土皆是請闕廷之下者  
靡日不盈於是備法駕順卜征襲時服肅天行河洛之  
人尚觀於後乘鄒魯之地已識其前旌水湛千年之色

山呼萬歲之聲常龍之峰帝鄉之白雲遙接金雞之岫  
長安之曉日再明所以登封降禪所以騰鴻飛英既刻  
石以頌美亦泥金而告成信四三皇而六五帝曾何周  
漢之足名然後審度量正權衡咨岳牧問黎氓人荷復  
除之惠家索牛酒之榮此聖人之東封也宗廟所以本  
仁祭祀所以尊祖馨香寧止於黍稷備物必該於水土  
故醴醎在堂菜醢在戶歌采芡肆夏之節奏文始五行  
之舞有來斯雍助我明主祝嘏祠說豈云虛取宜其時



和人豐而神降之祐也故所以靈芝秀祥飈興月珥下  
膏露凝奉先帝而追孝遂加敬於園陵此聖人之致孝  
也倬彼靈嶽傑出秦畿豁爲巨防壯我皇威雖國家盛  
德之無垠固先王設險而可依雄天府以岌岌符聖壽  
而巍巍萬物生華稟少陰之精粹五星分緯融太白金  
光輝俯壓黃壤上千翠微矧靈異之所蓄乃神仙之所  
歸實五鎮之爲首諒羣山之所稀且夫西嶽之爲鎮也  
大焉西方之爲義也多矣其色也白白爲五色之質其



上戕穹昊憑之者永安陟之者難老疊嶂重巒互稠沓  
千巖萬壑相縈抱其虛谷也數行發地緣茂松其峻壁  
也百仞懸崖不生草夫崑閬峙於方外蓬瀛傑於海島  
皆玄聖之所遊非化人之可保豈若茲嶽俯臨京鎬上  
有明星玉女峰下有長安洛陽道作鎮并崇於雍豫靈  
祠化傳於灋埽雖則祀典遠更於百王都未若祚我唐  
之壽考矣然則神其聰明正直而一既德則斯輔知信  
不可失往歲垂天文運宸筆勒琬琰崇望秩云待余安

民治國然後徐思其事懿夫俗阜時康今也正惟其日  
故可揚鴻徽而騰茂實奚不指河潼而嚴警蹕也又欲  
大康兆人兮嶽翼化淳四海兮嶽布冲和無疵癘兮嶽  
獎定禮樂諧神人兮嶽聽今萬邦胥悅四海肅清禮交  
樂舉人和政平豈猶茲嶽之所致實惟我后之明明又  
曰斯嶽降神生此多士則庶績咸若百工允釐河東地  
近領袖既得乎裴公圯上神人帷幄復歸於張氏况業  
固磐石城維宗子以爲肺腑之親更任股肱之理惟邦

是翰諒在乎此生甫及申豈惟於彼況乎聖德幽運通  
天至精山靈附化而開石蹊路非人而自成舊日隘途  
將帝道而俱泰從來絕險與太階而共平非我后至聖  
之所感豈能使造化之力再呈至乃紫闕東臨黃河北  
注嘉氣通於郊野休光被於草木桃林之野佇天馬而  
來遊蓮花之峰翼華蓋而高度昔禹禪吳會穆幸崑丘  
既江山勞止徒輟跡空留豈如是嶽不遠皇州何云歲  
時展狩信亦朝夕可遊今左馮郡縣萬方黎獻僉曰吾

王不遊吾何以休吾王不豫吾何以助咸傾想於班瑞  
之辰屬望幸於肆朝之處國家頻成大禮天下大和豐  
穰歲積符瑞日多聖人雖欲行謙光遜讓之禮其如天  
意人欲何其如鬼神符命何誠可備西封之盛儀採東  
巡之舊制順三秋之仲月升二華而展祭巨靈翬負願  
高掌以扶輪仙廟虛佇欲睟容而警衛尋可封十狀之  
美盡遙陟七梯之勢命茲毛女執左纛而先驅策彼茅  
龍隨六馬而高逝坐金機於雲表題玉冊於巖際象榻

與瑤壇共華石鼓將天聲俱厲如是則鴻猷振於萬古  
盛烈光於千帝然後臨大河而沉璧更秩於百靈睠東  
洛以迴鑾永延於億歲已而歸格藝祖道洽華胥更崇  
太室之事復率東岱之初遂就恒山而展禮望衡嶠而  
移車聖主功成永穆義皇之化小臣多幸敢獻登封之  
書

謁華山嶽廟賦

唐姚幹

沐蘭湯兮同之子采白蘋於南澗羞府君之明祀祠肅

肅兮山之下神萃萃兮凜千古辛夷楣兮葯殿房載雲  
旗兮駕蚪虎澹閔宮之瀏飭紛進拜於軒宇靈連蜷兮  
既留予蹢躅而屢舞願馨香而嘉薦豈神祇之或吐精  
享既周歷勝飛眸東拓巨靈之掌北控長河之流殷其  
雷也寧示口於鼉肩成其物也配祀典於清秋豈徒三  
峰峻秀四面若削扇萬壑以雲騰飛長天而雨落將有  
開之必先實明神之攸作則神也無私正直自持禍淫  
福善幽鑒無遺余總角之年每專精於書圃洎乎既冠



之日亦切磋於文詞謂一飛之摩吳胡十五之遊悲聞  
至誠之必應何功名之太遲豈媚竈而先獲寧守道之  
後時神乎神乎莫使心疑我后之文思望賢如調饑礪  
乃鋒刃以俟鹿鳴之時收片玉於宗伯冀神兮無我欺  
華山西峰賦有序

明喬宇

宇自蒲入關還過華陰歷雲臺觀玉泉入南澗抵青柯  
坪宿焉翼日由百尺峽以上路皆突與峻絕緣鐵鎖而  
拾級者遠或百步餘近者亦不下數丈駭聳奔蹙備歷

險艱午始陟玉女峰右折以行飲玉井之水躡巨人之  
趾遂躋西峰絕頂凌虛四望千里如掌所謂登泰山而  
小天下者雖移之華嶽亦未爲不可也虎谷王應韶獨  
至第一關而歸贈我長歌意與景會於時關中方以旱  
告同胞物與之情自不能已况采詢民瘼亦使者之所  
有事也乃爲賦一篇始則敘述登覽之勝終則爲禱神  
之辭義歸於正云爾其辭曰

粵鴻濛之始判兮迭陰陽以代謝星辰緯纏乎其上兮

山川流峙其在下維金方曰兌位兮實東井之分野盤  
千里以周廻兮屹三峰而并駕肇錫封於有虞兮列祀  
典於中夏嗟五嶽之特顯兮曰東岱與西華興雲雨於  
咫尺兮澤萬物而不頗肆配天之鴻勲兮贊化育之孔  
多固靈秀之萃毓兮儼神明之護訶善有福而惡有禍  
兮彼淫黷之謂何緊萬仞之削成兮麗層霄而莫狀也  
天梯石棧相鈎連兮殆秦昭之始創也通呼吸於帝座  
兮啓人跡之來往休祥瑞應之屢徵兮勤歲時之肝鬻

隱玉女之洞府兮擘巨靈之仙掌餐五粒之長松兮摘

蓮花之十丈奏廣樂於雲中兮羽蓋續其拜迎廣成洪

厓後先而相望兮咸通籍於蓬瀛丹葩瑤草不可以數

計兮人動稱以千載也信踪跡之詭秘兮亦好事者之

藻繪也余度渭以東跳兮仰巔屹而至止經華陰而覽

雲臺兮訪希夷之故趾涉澗水以南驚兮劃兩崖之開

張怪石硿礧以相軋兮馬跼縮而不行策吾杖以騁步

兮快青鞵之輕舉披榛莽以揮霍兮冒藤蘿之纒纒琳

宮隱見其上兮曰青柯之舊坪指巉巉之絕壁兮若天  
之不可階而升松飈響振於陰壑兮嵐霧涵其已暝山  
寂不聞乎人聲兮抱余懷之耿耿瞻千巖之競秀兮絢  
光彩於陽輝鳥道峻仄其莫攀兮訝鐵鎖之高垂峽截  
嶮以分裂兮露微明而中敞曲凌兢以仰穿兮類猿猱  
之下上足屢進屢却兮坐撫膺而長歎雖蜀道之十步  
九折兮曾何足彷彿其難探日月之兩丸兮跨蒼蚪而  
獨立汲玉井之沆瀾兮懷羽化而粒食歸西峰之絕巔

兮匪鼇極其孰援餐瀨氣而逝長風兮亘厚土之無垠  
南荆岷而北岐梁兮右秦隴而左嶠澠移萬里於指顧  
兮渺黃河之如綫連山若羣龍之蜿蜒兮背沙水之疊  
痕渺齊州之九點兮奚雲夢之足吞目眷眷以凝思兮  
澹冲默而不言爰浩歌而朗嘯兮與太清而爲鄰哂余  
生之好遊兮將繼踵於龍門五嶽始歷其二兮其三尚  
未覩其嶙峋酌醴泉以爲饗兮采紫芝以爲殮吾豈不  
知神仙之可學兮憫正學之日淪身欲下而未忍兮意

究然而狂奔望美人於山椒兮期永矢以勿諼思玄功  
之峻極兮偉萬世之永賴也苟災沴之弗蠲兮固神職  
之或怠也禾既稼而土墳兮念甘霖之未霈也彼西土  
之人兮紛嗷嗷其相待也鞭雷霆於頃刻兮尉枯槁之  
來蘇諒化機之神速兮遍率土而無餘旋吾駕於蒲坂  
兮挹天外之芙蓉固蒼生於品彙兮豈山川其舍諸述  
短篇以紀盛美兮事雖核而辭蕪神肯鑒於余衷兮庶  
斯遊之弗誣

恒山賦

明王 昺

惟大化之沕穆兮麗夫天地而爲依日月賁以貞明兮  
山川環帶而相維嶽於大漠兮嶄然巨石之峩峩奠八  
柱於鼇極兮鬱乎四海而揚波接烟煴於鴻濛兮作大  
鎮於龍荒簪相觀於八極兮一何隳突而昂藏吐靈秀  
以昭化兮興陰陽而噴薄何神驅而鬼驚兮渺茫茫兮  
寥廓崇秩禮於百王兮相祀典於邦伯挺萬象於昭明  
兮並九坑而赫奕肅清廟臨穹蒼矯霞棟架雲梁掩河



漢兮過星斗振虹蜺兮凌日光被玄袞兮載靈旗雲屏  
屏兮風披披忽而來兮儻而注官乎上下其何之作風  
雷以怒壯兮零雨霧而溥滋載羣生以涵育兮仰配蓊  
之四施興寶藏以烜珍兮滅妖氛於既戢含衆氣於有  
揚兮分兩儀而特立建天根於丕丕兮載坤軸而無疆  
相國祚於有靈兮一何萬古而爲長

登封龍山賦

明石瑤

石子抱病登於封龍覽燕趙之墟望滄溟之浦慨然太

息顧謂二三子曰美乎佳哉此陶唐氏之故都也巨嶽  
雄峙長河駿奔崇岡複阜如抱如蹲萬壑潒流匯為九  
澤大行崛起溢出平原川橫夏后之桴地藏虞舜之璧  
八年於外地平天成五月朔巡諸侯萬國天文別野星  
當昴畢之區土壤分州域介幽并之宅川紆嶺迴鬱鬱  
崔崔峭壁聳秀丹峰凝輝晴瀑挂百尋之長練顛崖轉  
萬國之驚雷上有蔽日干霄之古樹下有陵遷谷變之  
寒灰俗有避秦山多入晉岳被重封川經幾濬虎嘯風

列龍行電迅塞煙色舊李公燈火之臺古石光寒季子  
合從之印萬里交乎胷中千巖縱其一瞬其東則古之  
大陸也波洄鏡縈曼衍鏗錡菱蒲菱荷肅乎風生海鳧  
來遊鷄鵲互鳴放乎觀津之野帶於平棘之城漁浦流  
歌廊廟隔江湖之興秋郊舒嘯英豪含感慨之情竇氏  
青山馮唐故宅納牖道言引卮正色園仍茂草逢下帷  
之董生饁有高賓見耕田之冀缺人傳擊筑之歌士有  
談經之業貞觀章疏一代忠良稷下遺書六經羽翼疇

非治望乎唐虞豈獨事關乎列國其南則漢之鉅鹿鄣中也臺隍尚存煙屯霧昏想中興之舊業或寄跡乎荒原蕪蕪存豆粥之亭滹水望冰漸之渡北道主人塵埃物色對竈將軍雲龍際遇地存京觀李華興弔古之詞士遇明時文達展登瀛之步亦有閼闔池臺尚存平泉古樹閭里高門或三世而居司業或父子而握絲綸文妙一時張鷟號青錢之選才優當代衛公陳甘泉之箴翺有文章名崇史館絳真宰相官處詞林其西則戰國

之陁山也山愈巔峽水愈潺湲橫峰似劍列臺爲闌平  
臨三晉遙控全燕車不方軌士可當關料敵機危痛左  
車之不過燒丹火候訝隋女之登仙雪霽西屏冰封壁  
合雲鎖抱犢墮佩遺鈿誰登望海之亭直下螺峰之境  
地出危簷天開峻井龍蛇蚴蟉雨自東來麋鹿莽張泉  
從地湧劉因有志登福地而高吟敬仲多情撫遺蹤而  
自省篇成寶劍代國神遊文慕香山司空興冷悵九原  
之莫作幸吾生之登騁其北則古之中山曲陽也陵阜

迺遷達於代邊隧通窮漠谷帶長川萬籟號風危城際  
天士如貔虎人擁戈鋌名寢秦謀共畏廉頗之勇喟興  
漢髀人思李牧之賢宜安城復再收趙境武靈臺古遙  
下胡弦地存畫卦之臺巖有棄瓢之叟夢得一世之詩  
豪李嶠諸儒之領袖安平之崔下曲之魏累代名才靈  
壽之曹臺城之董一時勲舊朱輪紫綬門地猶雄取印  
提戈聲華未朽問其士習則樂孝友敦詩書不侵然諾  
砥礪廉隅氣不可平直欲裂強秦之缶清應有志幾思

登孟博之車節奮於窮壯形於老頸可刃而身不可屈  
頭可斷而碑不可草觀其民風則力織作勤畎畝童稚  
爲婚雞豚娶婦族多辨類等其清濁禮謹送終稱其無  
有至老猶勤雖貧不困人各守其淳朴俗頗希乎渾沌  
其尤在可稱者士不妬才人多服義彭亨狡獪雖貴蒙  
嗤清介端良在微亦貴野無健訟之民官乏舞文之吏  
上不煩於刑誅下易爲乎禁制此固先王舊澤雖經變  
故猶縷縷而未衰然實聖代洪仁漸染百年首股肱之

近地者也所可憾者人不思遠家無素蓄西成遺秉簫鼓連邨春事轉空券書絡繹平疇多發冢之夫柱礎有勒文之石民不知兵易爲搖動地無守險輕相躡躐蓋自列國之擾五胡之亂開元之掠長平之怨女真之入蒙古之僭谷變千回地經萬戰民無固志殆土崩瓦解遭亂離之孔多俗有俠情豈擊劍衝冠習流風之未變者乎嗟乎燕趙之地先王封建井田之地也燕趙之民先王衣裳冠帶之民也燕趙之俗先王禮義忠厚之俗



也奈何世治則有世亂則走晉既東奔宋亦南狩或割地以求成或退兵而蹙守使夫河岳增悲金湯冒醜衣冠興歔草木蒙垢資壯士於敵國納寇讐於戶牖棄神明之舊域設逋逃之淵藪人不爲怪士不知詬亦獨何哉此固有家國者之遠謀然亦士君子之宜憂不然高門縣簿華冕輕裘致身要樞列位公侯徒因時而補益亦何貴於名流亂曰山有摧兮石有泐疇造化兮無紀極亦何爲兮多太息

嵩山三十六峰賦

有序

宋樓昇

余少聞洛邑之盛在唐宋爲東西都而山川形勝之富  
視他州爲傑觀昔韓退之白樂天見於歌詩形容勝槩  
有詠歎不足之意後歐陽文忠與梅謝諸賢相繼爲僚  
友數遊嵩少間至今以爲美談余幸以不敏得令嵩高  
縱觀諸境未有過少室者而巉巖聳拔乃在戶牖間朝  
夕博望歷歷可數因作三十六峰賦以自廣非敢竊比  
古詩之流云

伊浮雲之公子兮訪道於林丘棲神於巖谷超然有游  
方之志兮乃東升於岱頂西謁於華麓雖衡陽之南兮  
與夫恒山之北靡不窮探歷踐兮遊心而騁目獨怡然  
而忘歸兮內欣然而自足忽御風而行兮排空濛而造  
中域徐睥睨以四顧兮意恍惚而有失遭嵩高之丈人  
而問津兮日游四方而真有得何高之不登兮何危之  
不涉今乃西望兮岌然而聳峙雄柱天網兮橫亘於地  
軸連絡偃覆兮龍盤而虎伏雖華以九而巫以十二兮

未覩奇峰之六六丈人放杖而笑兮秋水方至而河伯  
自溢子烏覩海若之難匹兮獨不聞中天之少室其高  
則嶢岈嶮嶮崱峿崱峿崱峿兮十有六里而疊有十八其深  
則環紆縈繞盤糾紛錯兮上方十里而周圍一百包嵩  
陽以作鎮兮截輶轅以爲郭眷歌山之所聞兮觀舞水  
之所樂其上則有嘉禾甘果兮神芝與仙藥石柱若承  
露之盤兮帝休若楊枝之葉石脂所滴兮飲之可以長  
上古玉膏在巔兮服之可以揖羽客雲母之井兮寶所

聚光明之穴兮晝所鑠一丈之鍾乳兮可餐千歲之資  
糧兮不絕其中可避兵水之災兮自有經書之博其神  
異則玉女爛織錦之文兮金人迷白露之落雲洞警時  
聞之鍾兮石井泣哀鳴之鶴王子晉環之以爲壘兮阿  
育王寶之以爲塔此皆公子之所未知兮而丈人之所  
安宅丈人曰名生於實兮義設於適子知其一兮未知  
其二子識其外兮未知其內是徒知六六之所有兮而  
烏覩六六之名義東朝嶽祠儼百神兮西望洛邑鬱千

官兮大陰少陽山之明兮石城石筍天所形兮檀香丹  
砂寶所鍾兮鉢盂香鑪狀所省兮連天紫霄勢之窮兮  
靈隱來仙洞府深兮清涼寶勝梵剎標兮瑞應瓊壁祥  
光紛兮紫蓋翠華煙靄凝兮藥堂紫薇花草靈兮白道  
天德名字偉兮卓劒白雲形實紀兮金牛明月色像起  
兮凝碧迎霞天光聚兮玉華寶柱金石瑩兮繫馬白鹿  
神仙衆兮此則六六之名義兮而未覩六六之景氣丈  
人曰方春陽之盡盡兮燒痕蕪沒而青青紛紅紫之繡

錯兮引百轉之幽禽雄樓傑觀兮切星辰而上侵玉仙  
神女兮乘輜輶而下征朱明草木之扶疎兮蔽大明之  
午升山椒雲氣之冉冉兮若覆甑而鬱蒸忽雨聲於天  
外兮勢翻盆而倒傾惟紫芝與黃鶴兮舞長空而產英  
金飈之驚葉兮山空落日若仙人之鍛聲夜月白而風  
泠泠兮玉笙清徹而彌聽暨玄陰林柯之脫盡兮山形  
瘦而骨稜稜冰雪橫積於千仞兮玉龍飛而白虎亭亭  
惟四時之出沒變態兮顯晦陰晴不可得而盡名豈得

仰觀俯聽自辰及酉應接之不暇兮以盡朝昏此雖丈  
人之所不能形容兮而豈公子之所可預聞丈人曰突  
兀撐空兮千變萬狀山經地志兮不可究量或背若相  
戾兮或面若相向或竦若相鬪兮或揖若相讓或散若  
相忘兮或聚若相訪或後者若和兮而前者若倡或卑  
者若下兮而尊者若上或喜兮若相攜或怒兮若相抗  
或若秦晉兮相匹或若楚越兮相望或儼瘦兮若裁冠  
或擁腫兮若挾纊或蹲伏兮若騎虎或崇聚兮若甕盎



或決驟兮若風馬或浮空兮若船舫或若遊郊原兮累  
丘墳而包樞槨或若入宗廟兮紛豆登而鬱秬鬯戢戢  
兮森劒戟落落兮列屏障勢領略兮斷而還連狀容與  
兮宛而復壯超然若三十六天兮神仙之洞宅姁然若  
三十六宮兮妃嬪之遊燕昂霄聳壺冠佩悠兮泉飛霞  
傾爵聳流兮天闊星煒玉杵成兮松篁瑟瑟鈞天迎兮  
嬌雲曲月鬢眉新兮煙斜霧霽龍麝焚兮霞舒霓卷舞  
袖張兮雷霆轟轟宜車還兮言未及而公子頽然如醉

兮灑然如醒非丈人無以藥之使瘳兮刮之使明僕未能窮茲山之勝踐兮究茲山之曜靈請執杖屨兮以從後塵

嵩山二十四峰賦

有序

明曹璉

按白虎通云嵩山者中央之嶽獨加高字者以其居四方之中而又高且峻也故詩曰崧高維嶽峻極於天此之謂歟山有二十四峰曰青童黃蓋浮丘三鶴遇聖萬歲玉鏡獅子虎頭起雲鳳凰金壺華蓋玄龜卧龍會仙

子晉玉柱老翁玉人玉女獨秀積翠太白皆遠近齊高  
無低昂之態有凝重之勢誠非天下山川比余因駐節  
騁目乃并志其名於左方以自適奚敢擬諸古賦云其  
辭曰

維登封之堙墟當胚輝之正中聳嵩高之嶄絕屹千仞  
而穹窿託扶輿以正基應房宿以曜空結根彌於崑崙  
直指超乎崆峒靄輪囷之繚繞迎義馭之矐矐匪嵯峨  
之莫測抑迢遙之難窮控齊梁之渺渺襟河洛之溶溶

俯首陽之隱隱超太行之重重回盤嶮巖奔突龍嵒峻  
極形於周雅配天始於唐封彼岱華霍恒之四嶽各分  
鎮於南北西東此則茲山之勝槩閱古今而獨雄也其  
爲寶藏也則金砂之璀璨璞玉之璘璫表中原之異產  
充上國之奇珍其爲靈蹤也則石室據其陽天池在其  
頂敞金刹於少林閤瑤宮於真境其爲品彙也則凡根  
茲之屬飛走之羣時涵時育以悴以榮超乎閭苑之翦  
鬱甲乎靈囿之縱橫是雖博物之張華無以辨其類治

聞之郭璞曷能究其名也若夫豐隆停震飛廉卷霽嵐  
光浮漢林影節日班二十四峰之駢羅脫瑤簪於螺髻  
肖迸筍之巔嵬侔列戟之排立卓乎彩筆書空而作軸  
儼乎玄圭平水而初錫聳乎蟠蚪昂角而崢嶸矯乎驚  
鵬垂翼而奮擊高低起伏遠近穠麗鄙羅浮三百里之  
磅礴陋武夷五千丈之宰律彼巫峰之十二匡廬之五  
老又奚可比而儔擬而匹也余嘗駕天風遊玉柱訪青  
童攀玉女尋子晉之奇蹤步老翁之幽址捫虎頭而舒

嘯憇黃蓋而徙倚面玉鏡之光芒盼三鶴之軒翥過遇  
聖兮浮丘躡玄龜兮如砥駭卧龍兮起雲間跨獅子兮  
會仙侶覽鳳凰兮雖雖灑金壺兮墨泚瞻華蓋兮亭亭  
呼萬歲兮鼓舞提玉人兮太白眺積翠獨秀兮延竚已  
而夕陽隱映而銜山歸鳥喧囂而投林蒼狗靉靄而四  
塞螭螭泯沒而曳陰麕鹿相牽而呼友猿狖聚嘯而長  
吟螻蛄噪而嗚咽於菟舉而蕭森斯時也余亦慄然而  
懼悚然而驚矯回首於盤谷遘一老而使輕冠高冠之

岌業佩長佩之崢嶸質銷鑠而綽約神杳眇而粹精歷  
玄冥之微徑乘間維而上征視倏忽而愈遠超寥廓於  
無聲欲從之而不可得乃托長歌而放情歌曰嵩山之  
谷兮虛明嵩山之泉兮澄清清泉澄清兮可濯纓谷虛明  
兮彷彿蓬瀛追仙翁而邈乎難及兮聊徜徉而尋盟載  
歌曰嵩之山兮儲英嵩之神兮效靈神效靈兮海宇平  
山儲英兮俊駢生吾知申甫其復出兮又將爲後証

嵩山賦

有序

明  
劉咸

五嶽惟嵩居天地之中而其峰巒之秀偉亦非他山可  
及故古今騷人墨客往往見之歌詠余不自揣亦掇拾  
其餘意而爲之賦辭曰

緊山阜之停峙均胚暉於玄黃諒凝形之有異故奠位  
而不常維嵩高之爲嶽獨穹隆而直方雖同列於上下  
實尊處乎中央左襟帶於河洛右控制乎齊梁前屏列  
乎崆峒後幃障乎太行彼秦華衡恒之四鎮各東西南  
北於一方茲蓋造化者自然之工巧俾其與天地同一



久長夫豈若尋常之培塿而屑屑然與羣山較利於毫  
芒也哉觀其元氣淋漓靈根盤結磅礴縈紆欽戲截莫  
質厚重而不遷勢蜿蜒而聯接量含弘而有容神昭貺  
而莫測萬象歛翕兮森羅四時光景分明滅燄燄大士  
之瑞芝森森將軍之封柏猗猗九節之菖蒲燦燦三花  
之貝葉彼四萬八千丈之天台固僅能方其太室之三  
尖而根盤五百里之匡廬曾何足抵其少室之數疊若  
乃時和景霽天高氣清風生鶴唳日出雞鳴霞彩凝兮

錦繡錯嵐光蕩兮圖畫呈於斯時也凌絕頂履峻嶒恍  
兮惚兮蓋不知夫此身之在人世而別有所謂崑崙之  
與蓬瀛也其或月暈星藏煙霏霧暗陽烏匿影虹霓橫  
漢轟雷霆兮一聲分晴雨兮山半於斯時也挾天風遊  
汗漫窈兮閼兮亦不知夫此世之在人寰而又有所謂  
青城之與赤岸也雖然此特其朝暮陰霽之常態而未  
覩其倏忽變化之形容苟欲究其所以則雖智者莫得  
而窮彼其兩室諸峯層出疊起不參不差無偏無倚在

少室者三十有六在太室者二十有四或萃律而崔嵬  
或秀偉而妍媚或迤邐而婆娑或隱約而虧蔽或羅列  
如兒孫或比肩如兄弟或尊嚴如父師或卑猥如媵婢  
或蕭散如神人或俊拔如豪士或如蛟走而蚪蠕或如  
牛眠而馬駛或如理木之連枝或如芙蓉之並蒂或如  
舟楫之浮空或如兵車之趨市或如忠臣之赤心或如  
豔姬之高髻矯矯兮如飛而翔飄飄兮如行而止于于  
兮如醉而醒怡怡兮如悲而喜凡茲山之奇勝所可愛

者如此然不指而稱焉則亦莫能默而識之矣故夫青  
童太白子晉浮丘玉人玉女會仙虎頭老翁遇聖兮相  
向黃蓋華蓋兮疊稠鳳凰鳴陽獅子號秋玉柱壁立玉  
鏡光浮三鶴積翠兮排闥萬歲獨秀兮凝眸卧龍起雲  
兮淨如洗金壺玄龜兮翠欲流此則太室勝槩之奇而  
天下之爲峰者莫得而侔也若夫東朝嶽祠西望洛邑  
白雲連天紫霄凝碧鉢盂丹砂之可觀香爐檀香之堪  
挹羅漢寶勝之可尋七佛靈隱之難覓太陽少陽之巍

峩石城石筍之屹立紫薇兮藥堂寶柱兮瓊壁來仙卓  
劍兮孤高翠華繫馬兮峻極紫蓋迎霞兮如丹玉華白  
道兮如璧明月清涼瑞應天德白虎留形金牛見迹此  
則少室勝槩之奇而天下之爲峰者又孰能與之敵邪  
又如琳宮梵宇佛洞仙巖蚪蚪出而書見菡萏發而霜  
寒龍潭隱靈物兮潛處天池通聖水兮潺湲歷代尊禪  
則有封祀之壇往來經行則有輾轅之關凡若斯之歷  
歷皆可考而班班者也至若名傳於今事出於古測景

定於周公化石由於啓母御筆書於則天金蟲築於漢  
武隱有棄瓢之許由廉有洗耳之巢父道有奕砮之八  
仙佛有面壁之一祖出而重於世也又有索價之山人  
居而莫知其向也又有擣帛之仙女其他奇蹤粲然可  
數既不暇於細推亦無能爲之悉舉也嗟夫拳石無情  
與時屯亨况非逢千載之景運抑安能得夫一時之謚  
寧惟聖皇之在上屢賜寵而錫榮崇嘉號兮以禮尊祀  
典兮以誠故嵩之德以之而益著嵩之神由之而益靈

自茲以往吾知太嶽之儲精必降申甫而駢生於以屏  
乎藩翰於以充乎帝庭俾海宇之臣子咸永樂於昇平  
而吾又當秉霜臺之白筆以專紀夫三呼之頌聲也

嵩陽賦

明盧 杞

楚王北遊登崇嵩之觀嵩陽大夫侍王乃涉蒙茸履崑  
歸長御遠睎汜濫無際顧謂大夫曰壯哉山矣寡人於  
茲殆將脫屣邪嵩陽大夫曰大王之言誤若臣者始足  
與憩焉爾王曰夫山蓄洩雲氣萬物所祖無貴賤遠邇

皆好焉子大夫私之已有是何厚於自待薄於寡人邪  
嵩陽大夫曰臣聞之傳記鷦鷯搏雲鷦鷯悅羣物各有  
適故其所託者殊焉王曰夫寡人舍此將復有說乎嵩  
陽大夫曰唯唯夫嵩維巨嶽極於圓祇之中橫帶汝潁  
崕峭於氛霄之上緣積霤之薄盛乎翠虹之嶂爾其三  
十六峰二室嵯峨靈巖浮歔隆豐岷岷峒叢轢互分嶇倚  
傍迂邃餘偃蹇行者中于久之却息汗脅增懼若夫窅  
阮豁豁虧澗無底窅窅窅窅窅窅窅窅窅窅窅窅窅窅窅  
窅窅窅窅窅窅窅窅窅窅窅窅窅窅窅窅窅窅窅窅窅窅窅




轉散髣髴松聲天雨新霽萬壑灌瀨湍濤溜汨碎頽雲  
噦礧砢疊響歛歔鬼怪於是離雄掩羽豺虎驚蹙慌忽  
謾台悚息川谷此誠山精魑魅之所穴處竊恐大王不  
遑託跡於此也王曰敬聞命夫大夫惡得獨憩乎哉嵩  
陽大夫曰臣少遊上都親侍諫垣陪列公孤尊三王貶  
五霸捐讓於魏闕之下爾廼南箕揚舌青蠅點白即墨  
膺讒寺人灑血解圭組脫鳴璫辭金墉凌風翔飄然霞  
逝廼昇乎嵩高之陽故其怡神育靈則攀緣巖峯傍眺

瑤城陟乎泰清盡足力而後返於青炎之圃徘徊於松  
桂之林激嘯於汧水之澗將折若華之英蕤江離襲幽  
蘭帶楚蘅猿猱媒於左廩鹿擾於右逍遙容與精神益  
壽然後檢搜巖穴探飲玉漿壁壇鳳笙銅鈺石牀希瑞  
呈露娛樂無方若廼王喬控鶴於林間密公失路於霧  
外少君捧節乎雲中劉根抗絕於人世莫不偃仰羣笑  
憑虛軒輊臣雖庸駑與通紹介故夫龍門三臺緱氏之  
嶺皆臣往來遨遊者也夫大王擁千乘之器妃嬪珍玩

之御不輟於前焉能避世長往哉王避席曰寡人不能也子誠爲嵩陽大夫

御定歷代賦彙卷十五



總校官庶吉士 臣張能照  
校對官編修 臣馬啓泰  
謄錄監生 臣姜也魯